

FIFTEENTH SITTING ON MONDAY, THE 2ND APRIL, 2007
(Time 10:30 A.M to 1:00 P.M. and 2:00 P.M. to 4:00 P.M.)

LIST OF BUSINESS

MEMBERS PRESENT

1. **Pu Lalchamliana**, Speaker at the Chair, Pu Zoramthanga, Chief Minister Deputy Speaker, 11 Ministers and 25 Members were present.

NO-CONFIDENCE MOTION

2. **Pu Lalduhoma** to move Motion of No-confidence as under :
“House hian he Sorkar dinglaiah hian rinna a nei tawh lo a ni”.

S P E A K E R : “Chutichuan, thil engkim miin in chungah an tiha in duh tur ang apiang chu, mi chungah pawh ti ve rawh u: chu chu dan thu leh Zawlneite thu a ni reng si a.

Matthaia 7:12

Zirtawpnia kan puan tawh ang khan vawiinah hian Ratu bialtu zahawm tak Pu Lalduhoma Motion put luh No Confidence Motion kan sawiho dawn a ni a. Kan Dan 141-na 6-na ah chuan Speaker-in thusawi hun bi a tuk thin ang a ti a. Mahse, han inrawn tlan hmasak hi thain ka hria, nge ni Private member Resolution kan tih ang deuh khan 10 minutes theuh hun kan inpe ang a, mover hi hun kan pe tam deuh dawn em ni ang.

PU ANDREW LALHERLIANA : Pu Speaker, Minute 15 phei chu hei tun dinhmunah phei chuan khua te a rei tawh bawh a, tlemin han tisei thei deuh phei la chuan 18 – 20 minutes te chu duhthusam a ni. Precedence hrim hrim kan en anih phei chuanin 15 minutes chu kalphung chu a ni. Kha kha kan tarlang a ni e.

PU R. LALZIRLIANA : Pu Speaker, min hruaina hi tha kan ti. A hun a kha chu 15 minutes emaw 20 minutes emaw chu ni hram sela. Tin, ni khatah hian helama kan thiante sawi ang khan kan hriselna te a inchen lova, kan tum chuan Dar 2:00 emaw Dar 3:00 emaw thlen a ngai ang a, kha ai khan Dar 4:00 ah emaw banga naktuka chhun zawm leh theih dan kawngte kha i ruat thiam em? Kha kha kan ngen che a ni.

S P E A K E R : Kha dar 4:00 pelh kha chu House thu thu a ni mai a; nakinah kan la inrawn turah ngai ta ila. Bill pali (4) kan la nei a. Naktuk chauh hi hun kan nei tawh bawk si a, a buaithlak ang reng khawp mai a. Sawi tam viau khanin a lo....

PU H. RAMMAWI MINISTER : Pu Speaker, Parliamentary Affairs Minister ka nihna angin Mizoramah hian he House-ah hian No Confidence Motion hi tunhma pawhin a lut tawh thin a, Zan riak lovin hetah hian an move veleh hian a zawh thleng kha kan kalpui thin a, chu chu he House a kan practise dan hi a ni a. Chuvang chuan move atanga a zawh thleng kha tunhma pawhin kan kalpui dan a ni a. Chutiang ang chuan vawiinni pawh hian kal a thain ka ring a. Tin, a darkarah pawh khan kan sawi duh zawng zawng chu kan sawi vek thei ang a, 10 minutes te kha chu a tawk alawm mawle, kan vaiin sawi kan duh dawn si a. (**PU LAL THANHAWLA** : Pu Speaker, i lal ber a, i thu thu a ni a, tha i tih angin ti mai rawh..)

PU LALDUHOMA : Pu Speaker, tuna kan Chief Minister hian 1998-a No Confidence Motion a put leh khan minute 25 pek a ni a. Member dangte minute 15 pek a ni a. Convention deuha kan neih hi chu han zah ta ila. Khatah khan tlema lo exceed deuh an awm leh inhriatthiam nisela. Ni khatah zawh tur anih pawhin tlai deuh mai ila.

S P E A K E R : Englovin a laiah pawt chat che u ila a tha lo maw. Minute 12 velah ti ta ila. I ti mai ang u. Tichuan dar 10:00 velah emaw kan bang thei anga.

PU ANDREW LALHERLIANA : Pu Speaker, no confidence motion hi a nihna takah chuanin subject pakhat maia inconfine chu nise chuan a hma ang deuh hleka demand sawite kha chu kha nena han lak kawp pawh kha thil theih a ni. Amaherawhchu, hei hi subject pakhat mai confine ni lovin kum 8/9 sorkar tawhte, sorkar tlak tawh lo an nihna hi kan hriat a ngai a ni. Chumi tur chuan he sorkar tlak tawh lote hian sawi an hlauhna chhan pawh hi eng dang a ni hlei nem. Sawi sawi an hlauhna chhan pawh eng dang ani hleinem. Kha vang khan khawngaih takin minute 15 ai chuan tawi lo rawh se. Ka duh dan chuan minute 20 ni rawh se. Hlahu tur a awm lo khawngaih takin i dinglama mite hi

S P E A K E R : Khawngaih takin Speaker hmasa Pu Vaivenga khan minute 15 a ti ngei a. Mahse, a sawive pakhat chu Budget Session Governor thusawi sawite, General Discussion-te Demand for grants zawng zawngah khan in sawive tawh bawk a ni a. Hun kha kan hmang ve viau tawhin ka hria a. Chuvang chuan 12 chu I ti mai ang u. Mover kha 25 chu pe tho ila. I ti ang aw. Chuan a sawi duh apiangin tikhan mahni hun kha hman dik tum ta ila. Tin, kan thu rei deuh hlek tawh a. A chauhte pawh kan chau deuh tawh ang a. Kan thinte pawh a ram tawh deuh ang tih ka hlau deuh hlek a. Chuvang chuan kan code of conduct te hre thar leh ila. Parliamentary language te hman tum hram hram ila a tha in ka ring a. Tin, chu lo lehah chuan dar 4 hi kan pelh ka ring deuh hlek a. Move thlak tumtu leh tan la tu kha thingpui leh a hmeh chhah deuh kha in in khilai duh loh kha ka ring deuh hlek a, vawiin bik atan chuan. Chuvangin Assembly-in kan member te tan khan tlai lam dar 5:30 ah nge dar 6:00 ah kan break ang. Ei tur, a then chuan tlai chaw a rin theih nghal tur awm chi ang kha Member bik te tan Assembly hi kan lo inring tih kha hriat nitasela. P.S.O. leh driver te erawh chu hun an nei turah ngai ila. In lama ei tur pawn. Member bikte tan kan inbuatsaih tih kha kan sawi ni bawk sela. Awle, tunah member zahawm tak Pu Lalduhoma motion House hian he sorkar dinglaiah hian rinna anei tawh lo a ni tih chu a motion neitu move turin sawm ila. Minute 25 vel hun hmang turah i ngai ang.

PU LALDUHOMA

: Pu Speaker, he House-ah hian mawilo

taka chetna te awm lovin tun hi kan thleng a, nang leh kan House Leader zahawm takin hawihhawm taka min kaih-hruai thin avang leh boruak in siam daih thiam thin vang ani tih ka hria a, inpahniha chungah lawmthu ka han sawi hmasa a ni.

Keini ho hi kan dam chhung chhiatni/thatnia intheihngilh tawh lo turte kan ni hlawm a. Chuvangin kan fraternity hi kan vawn him reng a thain ka hria a, kan vawiin hun hman mekte ngei pawh hi thangthar lo awm zel turte tana tradition tha kan hlanchhawmna remchangah leh Christian ram kan nih lantirna remchangah mawi taka kan hman tlan ka duhin ka beisei a ni.

Tin, No Confidence hi a puluttu nimah ila, he House chhungah emaw, a pawnsamah emaw tumah mimala huat ka nei lova, mimal ang chuan mifel tak tak, kan tluk loh tur vek anni. Ka ngainain ka ngaisang em em vek a ni tih ka sawi duh a. Amaherawhchu, Ram rorelna thilal erawhchuan ngaihndan te a lo inang lova, dodal loh theih loh deulte a lo thlen thin avangin, vawiinah pawh hian kan nunna atana hlauhawm thei thilte thlenga sawi a ngai dawn a. Kan zavai hian Ram tana thih ai chuan Ram tana dam reng kan duh theuhvin ka ring a, chuvangin hengte avang hian tu chungah mah mipui court/orelna piah lam hi thleng lo se ka duh em em a ni.

Pu Speaker, kan hriat angin kan State chhung leh a pawnah Hel chi hrang hrang an awm a. Hel kan han tih maite hi anihna takah chuan an mipuite tana beitu, pasaltha anni a, kan ngaisang a. kan zah a, tumah kan haw bawk hek lo. Nikuma Manipur lama Hel chi hrang hrang 7 (pasarih) ten United People's Front an han dinte pheih kha chu nakin zela Greater Mizoram a lo pianna tura rahbi pawimawh tak anih ka ring a, a ropui ka ti em em a ni. Tin, India Sorkar pawh hian heng Helho hi endan tawh a nei a ni tein kan hria a, chumi dungzuia thil engemaw tihte a lo awm anih pawhin kan hrethiam a ni. Amaherawhchu, kan sorkar hian vawi engemaw zat tualchhung politics khelhna hmanruaah heng hel thenkhatte hi a hman thin avangin Sorkar leh tlak an ni lo tih lantirtu an nih avangin chungte chu amal te tein ka'n sawi duh a ni.

Pakhatnaah chuan nikum September ni 17 khan kan Home Minister Bungalow-ah ngei hian Santi Bahini Commander Mukh ho nen Agreement an siam a, chu agreement-ah chuan Chawngte biala bye-election lo awm turah Santi Bahini ten MNF Candidate a tlin nan an bei ang a.

Mizoram Sorkarin Ralthuam a pe thung ang tih a ni. Chu thuthlung ang chuan nikum September ni 20 zing takah Police Motor hmangin, VIP light vuah chawpin, Khawzawl IR Bn. atanga Ralthuam la turin an chhoh ta a, hemi ni hian AK Rifle Russian siam 4 leh 9mm Pistol Czechoslovakia siam 4 leh Rocket Launcher cell 2 an han lachhuak a ni. Hemi tlai la la hian Aizawlah let lehin Chakma House-ah an thukru ta a ni.

Tin, nikum November ni 18 khan Khawzawl I.R. Bn. Hqrs. atang bawh hian ralthuam engemaw zat an han la leh bawh a. 9mm Pistol 1 chu kan Sorkarin an mi chhawr, hmanrua a an hman Constable Biakngheta Ex-MNA chuan a ma mimal tan a lo lak avang leh a lo hralh avangin a lo leak-out ta a. Tichuan, hmaiphihfai nan an man a. Champhaiah an hruai a, an chhuah leh nghal mai a. Hmanniah khan kan Home Minister-in he House-ah ngei hian he Constable hi ban a ni tawh, discharge a ni tawh tih kha a sawi a. Nimahsela Pu Speaker, discharge a ni lova, a hmingin an suspend a, full pay an la pe reng a, Police quarter-ah an chhungkuain an la cheng a. Housing Loan te an pe a, a lungnih loh hlauin an tlawn em em zawk a ni.

February, 2007-ah khan 1st Bn. I.R. Muavum atangin AK Rifle leh a mu te an pechhuak leh bawh a. February, 21 ni khan 3rd Bn. MAP atangin Santi Bahini Army Chief Naboa leh an Commander Mukto-a te leh heng thila kan Sorkar hotuten hmanruaa an hman thin Hmingtea te ho chu kalin 303 Rifle 2 leh Stengun 1 an lakchhuah tir leh a. Chu chu Chakma House bul Pu Rokhawa building ground floor-ah thukru a, chuta tang chuan Chhinga veng Biaksanga inah an sawn leh a, Biaksanga hi kan Chief Minister-in personal taka a security-a a hman a ni. March ni 1 zanah khan Paneiha in Khatla-ah an sawn leh a ni. Santi Bahini te hian 303 Rifle 2 hi an duh lova, an duh ang an pek theih rih si loh avangin an intibuai lek lek a, a tha nghah nan tiin March ni 4 khan 3rd Bn. atang bawh hian 303 Rifle 2 an la chhuak leh a, hei hi Hmingtea inah an thukru a ni. Tichuan, heng ralthuamte leh a mu 1260 leh pawisa fai 5,50,000 te hi March 7 khan Hmingtea leh Paneiha escort-in Phuldungsei lamah an thlah lian ta a. Anni hian Kanhmun bulah BLFM hotute hnenah 303 Rifle te hi an zuk hralh leh ta a ni. Pu Speaker, 2005 kum khan 1st Bn. MAP atangin Stengun 12 a bo tawh bawh a, 2 chauh recovered a ni a, vawiin thleng hian a reh hlen ta tlawk tlawk mai a nih hi.

Pahnihnaah chuan HNA chungchang kan kai ang a. Kan hriat angin HPC te leh Mizoram Sorkar inremna thuthlung bawhzuinaah Hmar mipuite an lungawi loh avangin HPC (D) a lo piang ta a. HPC(D) hi kan Sorkar te hian an kutkeah an duh angin an hman theih loh avangin.

inthlan lo awm leh turah Ratu bial leh hmun dang danga an duh anga an chhawr theih tur Hmar silai keng din tul niin Sorkar hotute hian an hre ta a. Chumi atan chuan Manipur atangin HRF hotu ni thin, Lianzama, Pu Ngurdingliana thah thua lar tak kha han hruai thla in Eden tharah in sak sa tha tak an lei sak a, an dah ta a ni. Tichuan Hmar National Army hi a lo piang ta a ni. Aizawl Post February 28 kan en chuan HPC (D) te thuchhuah kan hmu a. Chutah chuan tunhnaia Chhinlung Hills Development Council Chairman atana kan Sorkar in a appoint thar Hminchungnunga leh HNA leh Mizoram Sorkar chung pathum te tangrual chuan HPC(D) te an phiarruk dan leh HNA zawm duh apiang tan thlatin hlawh Rs.2000/- an pek thin thu vantlang hriatin an rawn tarlang ta anih kha. Lianzama thenawmpa hian Sumo MZ-011 B-4645 a nei a, hei hi thlabi in Lianzama hian a hire sak a, ralthuam phurh nan an hmang rim hle nia hriat ani. January ni 13,2002 khan HNA ten an lo lak chhawh atan Daido thlengin ralthuam a han phur nia hriat a ni a. January, 27 khan Khawlian thleng a kal leh nia hriat a ni bawh. Vanglaini March 15 kan en leh chuan HPC(D) statement dang kan hmu leh ta a. chutah chuan HNA parukte chu Edentharr atangin Hmingchungnunga tawngtai in a thlah a, HPC(D) te zawngin Daido ah HPC(D) mi leh sa pakhat an kap a. Khaw thenkhat ah civil te an sawisak avangin D ho chuan heng mi paruk te hi manin Tinghmun ram Tuiruang kamah an paruk hian an kaphlum ta a ni tih mipui hriatah an zia kin an rawn puang lang ta a nih kha. Lianzama inah hian tlangval sawm rual vel hi englai pawhin an awm reng thin a. Edentharr hnuai Bawngkawn lui kam Davida ramah, hetah hian Hmar nupa thlamah hian an dah a ram neitupa hi chuan engmah a hre lova, chutah chuan AK 47 leh mau hmang tein an training thin a, mi tam takin an mitin an hmu a ni. A then chuan an hlau va, an tlanchhia a, khawtlang leh YMA ten an ning a, hnawk an ti ngawih ngawih a ni. A bula Dawr velah te khuan zuk kal ula, heng mite hi an hausu khawp a Rs.500/- note leh Rs.1000/- note te an phawrh thin a, thlengnawi a buaithlak thin khawp mai tih an lo sawi thei vek ang. Heng kan tunlai boruak vang hi nge ni, zirtawp zan khan an in sa seng ta a. In sasengna atana an Motor hman te chu Taxi MZ-01 C 3995 leh nichina sumo kan sawi leh Hmingchungnunga Motor leh adang te an ni. Tunah khuan tlemte chu an la awm e.

Awle, Pu Speaker, HNA te hi kan do lo. kan haw bawh lo. Heng ralthuam keng pawl hnih karah hian tan lam pawh kan nei bawh hek lo. Hmar Inpui leh Kohhran hrang hrang inzawmkhawmte hian an inkarah ban an phar a, cease fire te pawh an siam sak a. Chutih laia tualchung inthlanna hmanrua atana kan sorkar ten tan lam leh puih lam nei a. hnam khat chhunga silai kenga indona an siam chhuak hi a rapthlak ka ti a, sorkar zel tlak an niin ka hre lo.

A pathumnaah chuan kum 2000 April thla khan Lalchhanhima leh Lalzawmliana leh Lalnunfela te chu BNLF ten an kidnap a, Lalnunfela hi a hnu deubah an rawn chhuah leh a nih kha. Heng an

kidnap-te tlan nan hian cheng nuai 50 demand-in kan Home Minister hnenah vawi hnih lehkha an rawn thawn a, a rawn thawn tu chu Blongburaha, Commander, Jornodo Operation Group, BNLF a ni. Chumi te dawr tur chuan Ex-MNA te tirh thlak an ni a, zalen taka an inhmuh theih nan Sorkarin mipui kal min khap a, Operation an suspend bawk a nih kha. Tichuan, Ex-MNA te a hmuna zuk kal, an ralthuam ken te nen Vartian chanchinbuah 6th May, 2000 kum khan hmuh theihin pholan a ni tawh nghe nghe a ni. Kan Chief Minister hovin an ngaihtuah a, cheng nuai 10 i pe mai ang an ti a, State Bank of India Mission Veng Branch atanga cheng nuai 10 draw chhuakin chu chu zuk pe turin an naute chu an tir a, BNLF te chuan a tlem em mai tiin an lo dawng duh lova, an lo haw leh a, nuai 10 dang an pek belh leh a, tichuan avaiin nuai 20 a tlan chhuah an tum ta a ni. Heng zawng zawng a remruat sak tu chu NSEN(14) a an Captain Agama, tum thlenga Tuikhuahtlanga awm khi a ni. Chutianga tlanna sum pek tum a hma an lak lai chuan Peace Mission a tum hnih na atan Rev. Lalsawma hovin tirh an ni a. Tichuan, Rev. Lalsawma chuan Lalrema tirin Commander hnenah lehkha ava pe a, an lo thlen thu a hrilh a, a ni chuan a rawn chhang nghal a, a tuk dar 5 P.M. ah inbiakna tur hun leh a hmun a rawn fixed a, amaherawhchu, "Tlanna sum in rawn ken loh chuan kan hmu duh lo che u, lo kal duh suh u" a rawn ti a ni. Pu Speaker, Rev. Lalsawma hi Mizo in pasaltha kan tih ang hi a ni ve tlat, pa deuhin tawi tein a chhang let a ni. "Tlanna sum kan rawn keng lo, nangmahni hmu turin kan lo kal dawn bawk hek lo," tih chiah a thawn let leh a ni. Chuti a nih chuan kan Peace mission te hna chua tawp ta a ni a ngaih tur a ni tlat tawh he boruak ah hi chuan. Amaherawhchu, thil mak tak mai a lo thleng ta a, an Commander hian lehkha dang a rawn thawn leh ta a ni. Chu chu 12th May, 2000 ni a ni. Tahchuan, "Keima level a inbiakna chu lo tawp tawh pawh nisela. Capital-ah thu neitu sang ber te nena politics te sawi duhin neih takin, in inbiakna tur hetiang hian ka ruahman e," tiin hun leh hmun a rawn ruahman sak diam ta mai a ni. Rev. Lalsawma te hian min arange sak rawh" pawh an ti si lo, ama thuin a rawn ti ringawt mai a ni. Engvang nge kan tih chuan, khatih lai khan lehlamah tlanna sum kha pek ani tawh a ni, an chingfel tawh. Chu chu kan pastor te hian an hre lo reng reng a ni. Tichuan, heta an lehkha inthawn tawna zawng zawng document te hi Pu Speaker, ka nei vek a ni. Tichuan ni 13 niah chuan zing takah chhuakin Peace Mission te chu Army Chief Lalnunsanga be turin thlamah hruai an ni ta a, an va inbe ta a ni. BNLF Army Chief hian tlanna sum cheng khat mah a lo sawi ri tawh miah lo, a hma a an subject lian ber ni kha. Vawikhat mah a lo sawi lang tawh lo. Rev. Lalsawma ten, "Hei an chhung ten meizial leh inthlakna tur thawmhaw te min thawn a, khawngaih takin in kutah kan dah ang a, min lo pek sak thei ang em" an han tih pawhin, "Hawn leh rawh u, pek a ngai lo, kan rawn chhuah dawn e" an ti nghal mai a ni. A hma a an khauh nen a va awlsam ta em! An lo chingfel tawh vang a ni. Hetih lai hian Ex-MNA te kutah mi tang pahnih te hi chhuah an ni a, an kawl reng tawh a ni, chu chu kan Peace Mission te hian an hre si lo a ni. Tichuan awlsam taka an hlawhtling ta chu an tawngtaina Pathianin a

chhangah te pawh an ngai ngei ang. Chaw te ei hovin lawm takin a tuk May ni 14 khan Aizawl panin an rawn chho leh ta a ni. Hemi ni ngei hian Guaisura leh mi pakhat dang escort tirin heng mi tang chhuah tak te hi Khantlang BSF hnenah an hruai tir a ni, an ni chuan Kawnpui Police hnenah pe leh in a ni la laa Aizawl rawn thlen pui theih ni reng chung siin Lengpuiah an riahpui leh te te a, a tuk ni 16 ah Tennis Court ah kan lo hmuak ta a nih kha. Pu Speaker, Tennis Court a kan hmuah lai khan tlanna sum zuk hlantu Ex-MNA te hian Aizawl an la rawn lut ve lova, Lengpuiah Ui an talh a, chaw an eikhawm a ni. Hetianga kan Sorkarin kan Sakhaw puithiam te mneuh pawh an bum duh leh hetiangah hun lo kal zel tur atan pawha kan ram tana pawh thei thil kan Sorkar hian a khawih avangin, thil dangah an sual a, an fello ka ti lo, thil tha tam tak pawh an ti, tluklohna tam tak pawh kan nei, mahse an kutah hian kan hnam hi a him tlat tawh lo a ni.

Tichuan khami hnu lawka June ni 12 2000 khan heng BNLFF te hian kan Police 7 min kahhlum sak leh a, paruk natakin an hliam a. Tin, Assam Police ten heng BNLFF hel ho hi Cachar-ah an lo man a. cheng nuai 20 an kut atangin an lak sak a. He sum hi tlanna sum kha ni ngei a rin a ni. Ralthuam lei tura an kal an man a ni. Chu chu kan Sorkar te hian an hriat veleh Assam Police kut atang chuan an zuk chhuhsak vat a. Aizawl ah an la chho va. Engmah an chung a ti si lovin, July ni 17,2000 khan Bairabi ah an hruai chhuk a, a tuk July ni 18 ah 2nd Leutenant Vanlalfela of Tuirum leh a hote chu Tlawng ral lehlamah lawnglengin him takin an chhuah a, an thlah liam ringawt a ni, a rapthlak hle mai. A hnuah Bairabi Police Station-ah hian tlanbo case an register tir a ni.

Pu Speaker, 2004 April thla khan MP Election kan lo nei hnai tawh a, tahchuan NGO te nen Save Mizoram Committee kan din a. Heng Bru refugee Mizoram pawn a kal te hi Electoral roll ah thun ni suh se tiin total band kan siam a nih kha. Mahse, roll ah an thun lui a, an thun lui ringawt ni lovin Postal Ballot 3620 an thawn thla a, chung zawng zawng chu April ni 19 ni hian BNLFF ten an chhuhsak vek a, Silchar ah an kal thlak pui a. Silchar ah Hotel ah MNF hruaitute nen inbia in MNF MP Candidate tan heng vote 3000 chuang hi, a bo a bang awm lovin an pe a, tichuan Silchar atangin dak-ah an rawn thawn chho ta a nih kha. Helho kut atanga Ballot paper dawnte hi chhiar ni suh se tiin Secular Force kan din a. Tin, "Heng BNLFF te nen hian Sorkarin Inbiakna kalpui suh se, Agreement pawh sign pui rih suh se, Boruak a tha lo em mai," kan ti chungin Agreement an sign pui lui a. Tichuan BNLFF 195 chu 2005 kumah an in surrender tir a, a lawmawm e. Khatah khan kan Home Minister in engnge a sawi kha? La in-surrender ve lo BLFM inti, a splinter group mi tlemte. in surrender ve lo an awm a. Kan dawr mek a ti a nih kha. Nimahsela, chu mi tlemte chu, an lo pung ta hluai mai a. October, 2006 a Kanchanpura an zuk in surrender tir khan mi 804 an lo tling ta daih mai a nih kha, Splinter group a tih te kha. Hei

hi Tripura DGP chuan Times of India ah "Stage managed a ni, lemchan mai mai thil a ni" tiin a rawn chhuah a. Hei a thlak pawh. Chumai sawi lovin MNF hotute hi helhote nen hian hna an thawk tam lutuk a, Aizawl chu Helho Centre a ni tawh a, Tripura hel, Mizoram Sorkarin an man te, kan kutah min hlan rawh u. tia kan ngen te pawh min hlan duh lovin an chhuah zalen zel a ni" tih te pawh a ziak duah mai a! Kan thenawm State a DGP meuhvin hetiang kan ram chungchang a rawn sawi tawh a nih chuan, vawiinniah member te hian hei hi chu kan ngaihtuah a hun ta hle a ni tih a chiang khawpin ka hria a ni. Inthlan hmasaah khan helho te hmanga vote an zawm dan zawng zawng kan hria a, ka sawi hman vek lovang. Chu chu Member dangten an la rawn sawi ve zel turah ngai ila. Chu chu sim lovin an la ti zui zel a. Pu Speaker, hetiang hi anih chuan nakum inthlan lo awm leh turah hian, keini chu kan campaign ngam ka ring lo. A hlauhawm em mai. Hei hian Democratic Institution hi a that a ni, Mizoram ah hian kan MPF te hmalakna zawng zawng te hi a thlawn leh dawn a ni. Hei hian Govt. of India nena Peace Accord siam pawh kha a violate a. Chuvangin vawiinnia ka thusawi hi. Central Sorkar pawhin ngaihven sela. A tul angin bawhzui se, tih ka ngiat a ni. Ngawih maina chi a ni lo. He an Gun culture hi a tawp loh chuan, hetiang an tih zel chuan, duhzawng leh duh loh zawngin awmzia a nei lo ang a. Policy tha leh thalo in awmzia a nei lo ang a. He ramah hian Democracy in awmzia a neilo ang a. Gun Culture hi an sim thei thlawt lo anih chuan, kan ram hmabak chu a thim hle ang tih a chiang khawp. Vawiinnia kan Sorkarna chelhtute hi mimal taka kan ngaihntat em emte leh kan ngainat zuizel turte pawh an ni a. Mahse. Ram rorelna an kalpui danah hi chuan kan hnam hi a himlo a ni. Rorel zui zel chi anni ta tlat lo mai. Chuvangin thildang tam takah tunhnaiah te pawh inthlan hmasa helho te nena hmalakna chungchangte chu keini sawi ngai lovin. helho te ngeiin an rawn puang chhuak tawh a nih kha. Mipui zawng zawngin kan thlir anih kha. kan hmu a, an hmel te nen lam, anmahni nen lama kan mita hmuh theihin an rawn pho chhuak ta zel a nih kha.

Dik tak chuanin hetiang thila hmanruaa an hmante zinga mi tam tak hi an lungawi lova, tihlungawi mai an awlsam tehlul nen, thuruk puan chhuah saka vau ten ten tawh hi an tawng hnem khawp mai. Mahse, tihlungawi an tum chuang lo, Engemaw hian a mawlh a, heng an thiltih hi mipuiin an hriat a hun tawh ani ang e, tih atin an awm mek a ni. Lungawi lo tam tak an siam mek a ni. BNLf helho tana Class - I contractor pakhat hnen atanga cheng nuaili an puk, heta kan Minister pakhatin witness a a ziak ngei, chupawh chu Pu Speaker, vawiinni thleng hian an rul duh hauh lo. Amah a dam lo lehngal. Chubak chu ka sawi lo ang. Chung thinrimte chuan keini sawi ngai lo hian mipui hmaah hian an rawn pholang lehzel mai awm mang e. Chutiang chu a nih avangin vawiinnia ka No Confidence Motion hi thinlung tak taka ngaihtuahin engemaw mai mai ang zawnga in lak sak lovin ram leh hnam thil anih avangin kan Member zawng zawngte hian min support turin ka duh a, ka ngen a. Tin,

chutih lain Corruption te tam tak a awm a, Aizawl Water Supply phase -II a contractor hnena CPWD Code kalha advance an pek vaibelchhe 19.86 te kha tun tuma Demand kan pass kha kan ena Pu Speaker, vaibelchhe 19 nei thleng lo Department 25 kan Sorkar hnuaiyah hian zu awm nia. Tuna kan budget pass takah khan, Demand 46 kan passed a, chung zinga department 21 chuan kha contractor hnena advance an pek aia tam budget an nei a, Department dang 25 te chuan a aia hniam vek an nei. "Thlai thar kan lei thei lo, pawisa a awm lo, support price kan pe thei lo," an tih lain department 25 te sum neih zat aia tam dan kalhin contractor pakhat hnenah chuan an duhnaah chuan an pe thei si. Heng zawng zawngte hi sawi tur tam tak a awm a ni.

Vawiinah chuan nakin zela kan awm dan tur chu tuman kan sawi thei lo, chuan politician kan ni, a changin kan inthen a a changin kan infin a, mimal ang chuan engmah sawi tur ka nei lo. Amaherawhchu. Politic angin, ram leh hnam angin, mipui rawng kan bawlina thuah hian, kan roreltute rorelna hnuaiyah hian kan hnam, kan nunna thlengin a him tawh lova. democracy in awmzia a nei tawh lova. India nena remna thuthlungin awmzia a nei hek lo, he Sorkar hi vawiinah kan paihthlak ngei ngei angai tlat a ni. kan hnam avangin. Chuvangin he ka Motion hi min support turin member zawng zawngte ka ngen a ni. Ka lawm e.

S P E A K E R : Le, tikhan a rawn move ta a, kan sawi ho ang a, tunge han sawi ang. A nemnghehna ang deuhvin thlawptu lam atang khan tunge han nemnghehpui phawt dawn nge ni, engtingge ni? (**PU LALCHHANDAMA RALTE** : Pu Speaker, thlawptu pawh a neih loh chuan buk ila a ni mai alawm). A nih leh House Leader Wind-up turin kan sawm mai dawn em ni?

PU LALRINCHHANA MINISTER : Pu Speaker, House Leader-in rawn wind-up sela kan vote ang a a ni mai alawm.

S P E A K E R : Helaia sawi ve thei lo tan chuan zawh-hma viau pawh kha ka pawh ti vak lo a nia.

PU ZORAMTHANGA : Pu Speaker, an sawi duhlo anih chuan
CHIEF MINISTER wind-up ila kan zo thei mai angem?

PU R.LALZIRLIANA : Pu Speaker, a mihring pawh kan inzath
lova, chuvangin nidang motion ang a ni
lova, thlawptu awm leh awm loh thuah
chuan hmannah sawm chuang zetih kan
thlawp tawh a. Chuvangin helamin an rawn sawi kha chu thu tlinglo a ni.
Chuvangin vawihinniah hian tuna a thusawi zawng zawng kha an pawm anih chuan
an bang mai tur a ni a. An tla nghal tur a ni, chutiang lova an sawi duh lo anih
chuan P.C. lam atanga Group Leader khawngaih takin sawm la, chutah Congress
lam atanga Group Leader sawm leh la, chumi hnuah chuan helamin amite pawh an
inrawlh leh thei tawh lovang a, tichuan House Leader i sawm ang a, vawihinniah
hian kan bang mai dawn nia.

PU ZORAMTHANGA : Pu Speaker, a sawi tur member in kan
CHIEF MINISTER decide thianga lova, nangma tih tur a ni a.
tunge sawi duh tiin i sawm a.

PU R. LALZIRLIANA : Pu Speaker, i hnenah suggestion ka siam
anah kha.. kha kha decide a i pawm dawn
chuan, tuna ZNP Group Leader thusawi
khan a ti mangang lutuk che u anih kha
inbuai tawh a nih hi, hmanna ka thusawi chhanna in hre miah lo ang khan heta
va chhuak a pawn lama va sawi an tum leh anih kha, Pu Speaker, a zahthlak lutuk
helai hi kan debate-na tur a ni.

PU ZORAMTHANGA : Pu Speaker, sawi duh in awm em kan
CHIEF MINISTER vaiin min zawt a ni. Tin, a move tu lam
pawh kha i sawm a, keini pawhin sawi
rawh sawi suh tih kan nei lova, tichuan
tumah an ding silova, chuti anih chuan tumah sawi duh an awm lo anih chuan
House Leader in dan pangngai angin ka wind-up ang a, i ti mai ang u ka tih
kha ka rawt ania. Sawi duh an awm anih te chuan Group Leader chang ni lovin
kan vaiin kan sawi thei alawm.

S P E A K E R : Ngawi rawh, min an ngaihven si a hei, tak tak ana No-Confidence hi. Chuvang chuan hun i hawng leh phawt ang. A sawi duh apiang ka veilam pawh ka dinglam pawh. Han sawi teh u, chuti anih loh chuan kan kal phung tura chu House Leader sawm a, chutah a ni a indefence ve ang a. Chutah mover in a hun tawi te a an wind up leh a kha a ni mai dawn a. Min ho an ti lutuk ang han sawi teh u. Hun hi a uihawm a nia. Hei precedent a ni dawn tlat mai. Zoram mipuiin an ngaithla chak che u a nia tak tak ana. "Ka rin ang a ni miah lo mai", an ti mai dah ang e.

**PU ZORAMTHANGA
CHIEF MINISTER** : Pu Speaker, chuan wind-up ila a ni mai alawm mawle an sawi duh loh chuan. Keini lamin an rawn move a, a move tu kha Leader-in ka chhang ang a tichuan vote kan la anga a ni mai alawm, an sawi duh loh chuan.

S P E A K E R : Le, hun a kal tam tawh a, chutiang chuan kan ti mai dawn em ni, House Leader rawtna ang chuan. Nge ni tlawmngai deuh tal pawn han sawi teh u a. A khawi lam lam pawh. Min thlirtute pawh an zahawm e a. Ka lo rin lawk dan nen a inang lo hle mai. Awle, hei hi kan Opposition Group lian ber Leader hian engnge a ngaihdan le?. House Leader hian a khaikhawm mai dawn em ni?

P U L A L T H A N H A W L A : Pu Speaker, ka lawm e. Nia, kan treasury bench lam atanga engmah a awm vak loh chuan a mover-in a remtih bawk chuan, a mover thu thua kei chuan ka dah mai a, leh nangma thua. Tin, House Leader-in a chhan hnuah khan, a mover kha hun i pe leh ang em? (**SPEAKER**-in minute 10 vel a pek tur thu a sawi a) Anih chuan a tha mai alawm.

S P E A K E R : A nih leh vawikhat ka zawt leh ang che u, Ruling lamah sawi duh in awm

em? (An awm lo a) A nih Opposition lamah sawi duh kan la awm em? (An awm lova) Awle, an awm loh chuan House Leader a chhang turin sawm ila, chumi hnuah mover minute 10 vel hun kan pe ang a, chuan a tul leh vote kan la ang a.

**PU ZORAMTHANGA
CHIEF MINISTER**

: Pu Speaker, ka lawm e. su a ti leh se mai a, tih kan ang ta riau mai a. Hei House Leader-in ka chhanna tur kha a hun min siam sak nge, kan hriat ngai loh

a ni a. Minute 25 bak chu ka hmang bik lo ang a. He No Confidence hi pakhatnaah a timing hi a dik lo ka ti em em mai a. A tir atanga BAC in kan programme an siam a, kan bill neih te enin tuna kan Group lampang tel ngei hian chhuah a ni a. Harhna Ni lo thleng tur, Nilaini amite, Nilaitawhtan Good Friday te, tibuai lo turin BAC ah programme siamin hmanni lawkah kan bill 6 neih te nitin 2 kan semdarh a. Nilaini thleng lo turin kan ti a ni a, chung zawng zawng ami pawhin an aw vek hnuah kan bill 4 te thawhtan leh thawhleha ngaihtuah ngei ngei tur a awm a, Nilaini Harhna Ni tibuai lo turin i ti ang u, kan tih zawh hnuah No Confidence Motion an han move ngat a. Tunah hian a dawt leh kha Naktukah hian a bill 4 kan zo ang nge? Harhna Ni leh thildang kha tibuai in kan kalpui dawn tih BAC in an ngaihtuah leh ang nge? nangma hovin in thlir dawn. Tih kha wawiinniah hian kan hmabak a ni ta a. Chuvangin pawl ka ti em em a, kan hriat wawi khatna te pawh a ni si a. A ni, a ni lo, han ti turin wawin kha kan hriatna a ni si a, document kan nei, chutah pawh kan chiang an ti zung zung mai si a. Chuvangin hetah hi chuan, entirnan pakhat chauh an rawn sawiah te khan. Chief Minister security ami Biaksanga an han ti a. Biaksanga hi ka security ah an la awm ngai lo reng a, kha kha keiin a kan sawi theih chu a ni. Tikhan an sawi zung zung mai si a, chuvangin a dik leh dik loh pawh a hriat theih tawh si lova, hei vang hian ka duh a chu, Home Minister zahawm tak ina leh kha a rawn thehluh ang khan, hetah hian khang chhang ve thei lo te kan puhna zawng zawng sawina chance a awm dawn si lova, Home Minister zahawm takin a rawn tih ang khan. keimahni Legislature Party ti ila kan House atang hian khang kha, a bik takin a nepnawi leh thildang zawng zawng a chu tih sen a ni lo ang a. ralthuam. hemi te hian heti hian an tawlh a ni tih tal kha chu enquiry ila ang. House a kan Committee kan siam ten khang kha apawimawh chin ralthuam tawlh a inpuhna leh khang zawng zawng kha chu i chhui tir ang, chuta a dik lo a nih chuan a dik anih leh a dik a ten an tuar ang, a dik lo anih leh, adik lo a ten tuar rawh se. chuti lo chuan wawin ah hian thil pakhat chiang tak kan zu hmuh theih ringawtah pawh, Biaksanga te kha hetah, House ah an han sawi a ka security guard ah Biaksanga a awm ngai lo hrim hrim, ka personal security ah hian. Khang te kha ralthuam dah naah an sawi zung zung mai bawk si a, chuvangin a dang zawng zawng pawh kha hei hi kan House Committee in kan Home Minister in a rawn tih ang khan a lian, ralthuam tawlhna chin kha chhui rawh se, chutah chuan Zoram mipui hian an hria ang, chu chu ka chhanna tawite ni rawh se.

...1110/-

Tin, chulovah chuan vawiinah No Confidence Motion move a, he Sorkar min han move a, a theory a, heta kan convention a, a dipui tu tura a sawm ten an rawn dipui a kha aawm pawh ka ti a. a chhan chu mi group leader-in a rawn move ve lem, move theih loh tura opposition dang tena rawn dipui duh lova kha chu mihring nih phungah pawh a ni lova. hawihhawm taka an rawn dipui a kha tha ka ti e. Amaherawhchu, vawiinniah erawh chuan he Sorkar hi a tla tur a ni ti a move tu sawipuitu pakhatmah a nei lo erawh kha chu, kha kha erawh kha chu, vawiinah hian amah leh amah hi a inpaih thla nghal a ni, tih hi Zoram mipuiin an hriat ka duh. Pu Speaker a support tu te khan pakhat mahin an sawi pui lo ka ti a nih chu. Chuvangin Pu Speaker, hetah hian kan Kohhran te hi kan ngai pawimawh tur a ni a. Kohhran ni pawimawh hi heng hian tibuai lo se tih avanga BAC pawn programme siam a thlawp a. Move dawn anih chuan a tirah ni tam tak kan nei. Khatihlaja ti duh lova, Kohhran ni pawimawh tibuai thei tur ngei ngei a, Kohhran upa leh Evangelist Speaker te meuhin a an han move duh hi chu a tha ka ti lo tawp mai.

Tin, a pahnihnaah chuan, Governor thusawi discussion ah nilengin kan duh tawh, eng ang pawh all free in kan sawi a. kan sawi zova. Nileng hna kan nei a. A dawt lehah general discussion budget ah ni hnih kan nei a. Kan duh tawh subject limit awm hauh lovin kan sawi bawh a. Tin, chumi hnuah nitin kan budget ah subject-wise in kan kal a. Sawi tur chu sawi zawhna hun, Sorkar hi an bei duh anih pawhin administration-ah pawh security ah pawh. Khati zat a chawlhkar a awm tawh a. Chumi hnuah chuan an sawi tur pawh an sawi zo thawkhat viau tawhin ka ring a. Tin, chu lovah chuan No Confidence Motion kan move ang a, tichuan kan vote thla ang tih beiseina an neih tak vanga ti chu ni sela, chu chu ngaihthiam theih a la ni e. Nimahsela, tunah a move tu group a kha MLA pahnih an ni a. Tin, opposition lamah min support vek ang pawh ti se tunah vawiinah 13 an awm a, ruling lamah 26 nang tiam lovin 25 kan awm a. a tla dawn lo tih pawh a Chiang sa a. Chuvangin engatinge sawi tur zawng zawng sawi theihna chawlhkar tel a liam a, an sawi zawh tawh hnuah chumi hnuah BAC pawh thu nawna Kohhran ni pawimawh hemi tibuai lo hian i ti ang u tih zawhah kan Upa ten a tibuai thei ngei ngei tura tlaikhaw hnuah an han pulut leh ngat hi a awm lo kan ti khawp mai. Chuvangin hei hi kan culture ah leh kan convention ah kal tawh lo se ka duh khawp mai. Chu chu a spirit ah kan sawi a ni.

Tin, a dawt leh a ka'n sawi leh duh a chu, tikhan hemite Motor number hian, chumi hnuah chumite pawl chuan ralthuam an la a, chumi Inah an kalpui a, an ti a, an sawi zung zung mai a. Khang khan hetah hian an rawn chhang ve thei dawn lo a ni tih hriain eng ang pawhin, dawt muhlum pawhin puh nisela, chhan theihna chance an nei thei lo reng reng a ni tih (SPEAKER : Khawngaih takin dawt muhlum tih tawngkam hi chu a parliamentarian lo a, thlak leh nise a tha ang) Awle, ka lawm e, thudik lo leh thubelhchian dawlo

pawhin puh mahsela, chhan theihna chance an nei lo a ni tih hriain, chungte chu vawiinah hian pawnlam a mite kha kan inpuh kual ta chiam mai a ni. Keini kan hriat vawikhatna te a ni si a.

Pu Speaker, hetah hian ka rilrua lo awm a chu, kan tunhma a kan History kal tawh a, Leader tumah kan lo inrin lohna, khami a kha kan hre tlang a ni awm e. Sawi hrehawm tak te chu a ni. Chuvangin, tuna rawn move tu, kan Member zahawm takina mimal min lo sawi dan zawnzawngte kha a hriat pawh kan hre reng a niang. Kan member zahawm tak, kan group leader Pu Hawla chungchangthuah te pawh mahni Ina haw nachang hre tawk tawk, Sual tinreng bul a ke ler atanga a chhip thleng pawha tha lai reng reng awm lo, Setana tirhkoh tia an lo record-na thinte pawh kha an rilruah a awm ve reng a ni mai thei. Brig. T.Sailova Brig. Pension dan lungchhiatthlak, mi tih thinrim anih loh chuan ka sawi kher lovan g e. Tar bengchhet, Tar a, phiarru Lalpa. Belzebula a nih hi, mahni Mizo puite thisen chhuah chaka tuihal, an mitah hmarcha lo phul ula, hreipuiin lo chek hlum zel rawh u. Thenphunga ang hi Ganges lukamah khuan diar phelh phungin an insu sup sup mai. Putar bengngawng hruaina hnuaiyah hian ram ropui kan thleng lovang tih kan lo in-recommend nate kha. Khang te kha mi sawi ka'n repeat anih chu. Pawn lama silai tawlh aia hlauhawm anih chu. Pu Speaker, tuna rawn sawitu ngeite pawh kha anni pafa hi an pafa chauh a Party din ngam, an at huai a ni. Kei pawhin ka lo hlawhchham tawh thinna Party thar an din ringawt mai hi chu, mi ram tana thluak hmang zo tawh, zuitu reng an ningnel hi a tih hnu te anni thova. Chuvangin, kan group Leader dangte pawh tihian nasa takin an lo sawi tawh thin a. Kan Member zahawm tak Pu Lalhmingthanga te pawh (SPEAKER : I ngaithla ang u aw) Hei aia mimal beih ropui a awm lova. Chuvangin, No Confidence Motion nen kan kal anih kha. Engpawhnise, Pu Speaker, khalam chu a huatthlala em mai ka sawi tawh lo mai ang. Kan hriat vek tlak pawh a ni lo. A midang min sawi dan a kha, a mimalah ni lovin, an arpa hlui sen ka talh sak a, arpa dumin ka thlak an tih zawnzawngte pawh kha. Khang kha chu kan sawi tawh lo mai ang. Party beihna kha. Engpawh nisela, ka zuk sawi awmzia chu tuna kan No Confidence Motion move tu hian a hma Sorkar hruaitu leh Party Leader-ah hian confidence a nei ngai lo reng reng a ni. Congress leadership khati khawp khan atlansan a, chumi hnuah P.C. ah an lut a. Leadership ring lovin confidence a nei lo a, a tlansan a. Khatiang khan a lo kal zel a. (Interruption). Pu Speaker, an sawi duh si lova, ka sawi mai a ni. He no confidence motion move tu hian a tumna hi a dik lo a ni tih zuk prove ka tumna a ni. Chuvangin tunah pawh MNF ah lo lutin theih tawpin ka zui dawn tia mipui hmaa a tiam hnuah a hnu lawka theih tawpin a phatsana, chuvangin tumah hi confidence a la lo hrim hrim a, ama party din leadership pawh tlansan a, confidence a nei chuang baw lo a. Chuvangin vawiinnia move a hi a duh duh rawn phuahin tikhan tiin min an prove a, an rawn inbeih ngar ngar mai hi chu ka rin a ang lo a. a paw ka tih chu sual khuh tumna atana simna nei si lo sual danga inkhuh mawi tum ringawt

mai hi chu (Interuption) sawi ve theih lohna tur chi point lain in-development-ah in chak lo, he Sorkar hi a dik lo. Chuvangin in policy in kalpui dan hi a dik lo tih sawi lam ni si lovin. Chuvangin, chumi lama development leh kan financial position leh thil dang sawi lovin, "pawn lama midangte silai tawlh chumite pawh," tih ringawt a rawn lak luh avangin khang kha i chhui ang u ka zu tihna lai chu a ni ta reng a ni. Tin, kan chhui ang tih ka ring bawk. Tin, Police tan lah hrehawm, a rawn puha te tan lah hrehawm, underground mi tan lah hrehawm. heta mualpho thei ang bera, kei phe chu hetah hian, " I Sorkar na hnuaiyah hetiang hian a awm e," tih kha ani mai a. A accuse ber a te kha chu pawn lam mi ber vek an ni nghe nghe a. Chuvangin khatiang a nih avang khan Pu Speaker. khang kha kan chhui tur ani ka zuk tih kha a ni a. Chuvangin, tuna no confidence motion kan move hi, nidangah chuan kan move hemia a kaldan hi adik lo, hei hi an pawisa hman dan, an development policy hi adik lo tiin kan inbei ngai kha a ni a. Tunah chuan pawn lama 80% mi deuh thaw a rawn accuse a ni. Chuvangin midang tumahina a sawipui duh lo pawh hi a awm a ni. Chuvangin kei leh ka Sorkar chu confidence chu min nei lo reng ang.

PU LAL THANHAWLA : Pu Speaker, mipui hian an eiruk nasat zia te, an hamthat zia te heng zawng zawng hi an hre vek a, hrih an ngai tawh lova. an hriat loh kha a rawn hrih mai a ni.

PU ZORAMTHANGA CHIEF MINISTER : Pu Speaker, kei pawh an hrih loh kha ka han hrih ve a ni a. An hriat loh kha ka han hrih ve a, a na an ti a, an lo ding sup sup a nih kha. Chuvangin hengah hian, kei leh ka Sorkarah hian neih chi hi a ni lo hrim hrim, a tu amah hi a confidence a la lo hrim hrim a ni. Chuvangin, a thawhpuite pawh khatiang ang kar anih avang khanin vawiinniah hian he Sorkar in mipuiin development atana kan lak zawng zawngte, kan hmachhawp te, kan kalpui na te tih sualte pawh kan nei ang, tih fuh pawh kan nei ang. Chung zawng zawng chu a takin an hmu vek a ni. Chuvangin, helaiyah hianin buaina a awm a, vote thlakin a awm a. tichuan mipuiin a dik lo an tih chuan an vote thla mai ang a, chu chu a bukna tur pawh a ni ang a. Chuvangin, vawiinniah hian Pu Speaker, ka hun pawh ka hman rei ta bawk a, ka duhtawk tawh ang a. He No Confidence Motion sawipuitu pawl pakhat mah nei lo House Leader-ina a chhanna liam tur ringawta hi kan precedence hmasa ber a ni, no-confidence Motion zawng zawnga a zialo ber niin ka hria, chuvangin, he Sorkar hi hei hian a din zel a pawimawh zia a tarlang a ni tih kha move thlak chi a ni lova, sawipuitu pawh neilo move hi chu engmah lovah a liam ka ring tlat a, vote-ah pawh ka demand reng a ni e, ka lawm e.

S P E A K E R : Motion neitu member zahawm tak Pu Lalduhoma i lo sawm leh ang, minute 10 aia reilo ni se.

PU LALDUHOMA : Pu Speaker, ka lawm e. Vawiina kan rorel lai hi ram mipui ten an ngaihven em em a ni tih kan haiin ka ring lova amaherawhchu, kan ruling lam atangin khang kan thil sawi chhuah zawng zawng te kha chhnglet thei pakhat mah an awm tak loh avangin, hetia mipuite beidawnga kan siam ta mai hi Zoram mipui hmaah pawh thupha chawi a ngaiin ka hria. Keini lamah chuan Pu Speaker, kan rel sa thlap a, tihian heng kan point te hi kan theh pheii anga, sawi tur an neih chuan an rawn sawi ang a, an neilo anih chuan House Leader-in chhang mai rawh se, tiin kan rel sa thlap a ni. Chuvangin, sawi tur an neih loh avangin Zoram mipuite hmaah hian sawi tur an neih loh zia hi an pholang a, mipui kan ti beidawng a nih hi. Tin, Pu Speaker, a point chhung pakhat mah sawi tur hre der si lovin tun hmalama kan la chin ngai reng reng loh mimal thil ringawt mai kan House Leader meuhin a rawn sawi ta mai kha, amah mark ka pek hi a hniam ta khawp mai. Dik tak chuan he lama thu te hi nasa tak taka inbei tawh theuh kan ni, inbei thang tak kan ni tih ka pha lo, mahse politics-in kan inbei a, ram leh hnam thilah kan inbei a, mimal in kan inti ve ngai lo. Mimal thil rawn lakluh hi MNF culture a ni a, nichina a sawi tak zawng zawng “Setana tirhkoh” “Phiarru Lalpa” “Tar bengchhet”, tih zawng zawng te kha a tu amah hian kan ram hruaitu chinin an sawi ka ring lova, khang kha khawi laiah nge a inziah tih hi prove rawh se. Tun chinah hetiang tawngkam bawlhhlawh hi an hmang ngai lo. Chuvangin, “Chhak lamah an kal chuan thlang lamah an kal ti rawh u,” ti thin hote puah chawp mai a ni e. Pu Speaker, kum 10 kal taah khan min tichhe turin J.H.Thanpara, Gypsy pein an tir a, Zoram dung leh vangah an tir a, cassettes sang tel an siam sak a, an thehdarh tir a, nasa takin, ka nu leh pa te thlenga rilru natna turin min puh a ni. Tichuan, chumi chu reiloteah a cancer a, a thi ta hlauh a ni. Ka tan thil thar a awm lo, ka In an raid tir thul nen, ka Inah hian engemaw hmuh in inrin le? In duh leh min rawn leipse vek rawh u. Tin, Sorkar hmasa chhui a thubuai siamsak te hi tumahin an la tih ngai loh a ni. MNF hotute hian kan rama la awm ngai lo, thil thar lo an ching chhuak fo mai. Chuvangin he Sorkar kan rin tawk lohna chhan kan sawi pakhatmah chhan ngaihna pawh hre silova, thil dang dang a rawn pet kual duah ringawt a ni. Kawng lehlamah erawh chuan a lawmawm ka ti a ni. Chief Minister khan “Phat ngaihna ka hre lo a ni”, a tihna a nih avangin. Awle, Chhinga Veng pa kha a awmna chu Chhinga Veng atanga Tuithiang lam pan pheina hnuaiyah kuan a ni a. Mimal a amah veng him tura a hman char char a ni. Ka chiang lutuk a ni, a PSO a ni ka ti lo. Mahse, Police aia a rin zawk a ni.

Tin, House pawn lama mi hming ka lam zawng zawng te khan anmahni thua ti an ni lova, an ti tih vek a ni. Vartian Chanchinbu a Ralthuam nena an kal lai thlalak a lo lan pawh khan kan Home Minister hian a hau hrep hlawm a nih kha, kan hre vek alawm. "Tunge thuruk ti leak out che u," a ti a ni. Chuvangin khang mite kha in sawifiah turin kan ti lo a tih tir tute hi insawifiah mai rawh se. ZRO te thil sawi te pawh kha chhang rawh se. Sawi rei an hlauh avangin tumah an ding ngam lo a ni tih hi a chiang em em a ni. Tu Sorkar mahin Session Programme an duanin BAC in No Confidence Motion atan programme an duang sa ngai lo. No Confidence Motion thehluh hun atan a timing bik a awm hek lo. A thehluttuin a thehluh hun hun kha a timing chu a ni mai a. Speaker-in a admit hun apiang kha a sawi hun chu a ni leh mai. Chu chuan Programme siam sa chu a tibuai lo thei lo.

Awle, Harhna ni hi kan sawi teh ang. Harhna ni hi kum 100 anih na ni kha kan lawm a, kan lawm kum chuan awmni khamin kan Zoram pumah kan hmang. Chumi kum ni lo chu awmni khama hman a ni ngai lo. Nilaizan bu te hi en ve teh u. Zan programme chiah hi a awm a. Chumi chhuanlam a hmang turin tunah programme kan extend pawh a la ni si lova. Kohhran upa ni si, Kohhran ni pawimawh tihbuai tum min tih hi a dik lo, kan tibuai dawn hek lo. Session pawh extend mah ila kan tibuai dawn lo. Zan inkhawm kan tibuai ang an ti a nih chuan nilai nia kan programme zawng zawng khan a lo tibuai tihna a nih dawn chu, kha nen khan a inang reng a lawm. Chuvangin programme awm chu nilai thawhtan zanah Good Friday Eve kha aawm leh a, a in ang vek a ni. Zan inkhawm chauh vek a ni e. Chutiang a nih chuan tumah kan him bik lo, nilenga hman tur tih Nilaizan bu ah pawh a inziak hek lo.

Tin, House Enquiry din a rawt kha ka thlawp a. Pu Speaker, hmanah Agriculture Director in nuai 70 chuang a tih chingpen thu helaiyah hian kan sawi tawh a. Enquiry Committee din kan ngen a nih kha khami tuma ka sawi kha kan sawi nawn teh ang. "Enquiry Committee kan din dawn a nih chuan Opposition hi Chairman ah min hmang ula, kan tel ve ang, in inhnamhnawih loh tak tak chuan inhnamhnawih loh zia hmuchhuak tuah min hmang ula, darthlalanglah m in hmang ula, mipui hmaah inhmai a fai ang, in ngam loh erawh chuan he Enquiry Committee hi ka pawm lo sa" tih ka sawi a ni kha. Chuvang chuan he Enquiry a rawt hi opposition lamin Chair an luah thei dawn emaw, an member-ah kan tel ve dawn emaw anih loh chuan ka pawm lo sa, telna tlak a ni lovang. Amaherawhchu, kan tel ve thei dawn anih erawh chuan a tha a. kan tel lohna chu Agriculture Director nuai 70 chungchangah pawh engmah cheng khat pawh recovery awm lovin a result hre lovin Zoram mipui min la siam tho tho a ni. Health Department a nuai 100 ba te kha i telh vek ang u. Suangpuilawn kidnap case, kum 4 chhunga an chhui chhuah theih loh te hi i telh law law ang u hmiang, Vairengte a Soil & Water Conservation Department in an hralh ringawt te

kha i telh vek law law ang u. Pu Speaker, eng ang pawh hian mimal in min bei mahse, No Confidence ka move hma khan hetia min tih tur hi ka hre lawk vek. Tun tum bial inkhawmpuih pawh khan kan bialah chuan Thlarau lam thupui sawitu ka ni a, kan thupui pawh "Rorelna fel" tih a ni. Pathian zarah chutiang sawi thein ka la awm ve a, kan Bible chuan, inthawi te, thilpek te, inkhawmpui te aiin rorelna fel Pathianin a duh zawk a ti asin. Anih leh kan rorelna hi a fel em? Silai nen a hetiang mi vau thaih chin te hi a fel em? Dawt chi hrang sawi a, thu mawi tak tak "Switzerland of the East" kan nihna tur, Bamboo Road, mau kawng sialna sanction a lo thlen har avang maia thulh leh ringawt te, mumang rama chen a nuih ver ver a, hlim viau ringawt te hi a hun tawh lo. Chuvangin, helaiah hian ka thusawi pakhat mah min lehthlak sak theih loh avang leh khang tawngkam mak leh bawlhhlawh tak tak te kha kei leh tumahin kan hman ngai loh a ni tih hi ka sawi nawn duh a. Chuvangin kan buk ang a, buk kha ka duh a, tichuan Zoram roreltute zingah hian tute nge, engzatnge thudik tan a ding ngam, kan tlem emaw kan tam emaw hriat ka duh a ni. Tin, vawiinniah hian Moral responsibility la pawh he Sorkar hi a ban ka phut a. Tin, kan thusawi te hi Central Sorkar inrawn chhui zui ngei se ka duh bawka ni. Ka lawm e.

S P E A K E R

: Awle, tikhan kan sawi hona kan duh tawk tawh ang a. Motion neituin rawn wind-up a. Tin, buk kha aduh bawka. kan buk ang a, Buknaah hian a hmehkhep

chi kha kan nei ve mang si lova. Voice vote in nge ban kan phar ang tih kha, a nih leh voice vote in kan ti phawt ang a, chuta a chian loh leh ban kan phar dawn nia. (PU LALRINLIANA SAILO : Pu Speaker, Secret ballot in ti teh ang u, an tla em em ang)

Kan danah hian secret ballot hi a awm chiah lo a ni. A nih leh buk dawn ang aw. Kan Motion kha "House hian he Sorkar dinglaih rinna a nei tawh lo" tih a ni a. Chu chu pass remti apiangin 'remti' ti rawh ule, remti lo kan awm chuan 'remti lo' ti rawh ula. Ka beng dinglam hi a chak deuh hret nge ka hre lova, a chiang kan ti em? A nih leh chian ang aw, Kan Secretary te kha lo inring sela, kan thuthmunah kan phar theuh dawn nia 'House hian he sorkar dinglaih rinna a nei tawh lo' tih remti apiang in ban phar rule. Tunah House hian he Sorkar dinglaih hian rinna a nei tawh lo' tih remtilo apiangin ban phar rawh u le. Le, remti ti lam kha 13 inni a, remtilo tilam kha 25 inni a. Tichuan House hian he Sorkar ah sorkar dinglaih hian rinna a nei tawh lo tih Motion hi House-in a hnawl a ni. Le, tikhan vawiina kan List of Business chu kan zo ani der mai a, tlai lama kan thilsiam ve pawh chu eitur pawh in awm tawh loh hmel a, amaherawhchu, kan tindarh hmian kan hriat theuh ang

khan Bill 4 kan la nei a, chu chu naktukah hian kan la vek ang nge niang tih a awm ta a. Chumi ngaihtuah tur chuan BAC kan thu leh phawt ang nge. House hianin kan rel fel nghal law law ang.

PU H. RAMMAWI : BAC thut hnuah pawh khan i thurawnna
MINISTER ang khan pawl hrang hrang Group hrang
hrang Co-ordinate a ni leh tawh a. chumi
hnuah pawh chuan a rem leh thei tawh
lova, Chuvang chuan, House ngaihdan i lak mai ava tha awm e aw ka ti.

PU R. LALZIRLIANA : Pu Speaker, Member te hi i pe ta tho tho
bawk a, kan Session pawh hi ala rei
chhe lem lo bawk a, State dang ngaihtuah
chuan, khatiang anga engemawni harh
tharna thlenna ni tihvel leh engemawni kan ngai pawimawh anih chuan BAC thu
ila, karleh thawhtan leh thawh leh velah chhonzawm ila ni mai lawm, a tha mai
lawm ni ?

S P E A K E R : Nia, Pu Duha khanin zanlam inkhawm
chauh a awm alawm a ti bawk si a, nak-
tuk leh a tuk leh ni..

PU LIANSUAMA : Pu Speaker, Veng thenkhat chuan chhuna
hmang tur te an awm tho mai a, chuvang
chuanin kan Dan hi a then chu Amend-
ment hlek hlek te a ni a, Paliin naktuk
hian la kawp mai ila tichuan a rei thawkhat tawh a, kan Session hi April thla kai
vang tak a ni. Chuvang chuan, Sorkar Office lam pawh a thuanawp rei tawh a.
naktukah lak zawh mai hi kan han rawt a ni.

S P E A K E R : Kan Bill pahnih kha Amendment a ni a,
pahnih dang kha chu Original bill Health

Clinic chungchang leh Road Fund a kha niin ka hria, harsa lutuk loin kan chai thei mai ang em ?

S P E A K E R

: Enge ni MPC lam group te, ZNP group te ngaihdan ? Tiang chuan kal kan tum phawt mai dawn em niang ? Naktukah a pali khan han dah ta ila, chutah kan thei ta ngang lo anih leh a tlachawpin kan rel thei vek tho a nia, a tha mai em ? A nih leh tiang chuan naktukah kan Bill te chu a pali khan han la ta ila. Nia hei hun dang ang lo deuh hlekin a copy te pawh kan inpe hma thei deuh hlek tawh a, tun tum chu a lawmawm a. Chuan naktukah Bill pali kha list of business ah han telh phawt ta ila a tha ang e. Chuan kan chawl rih ang a, naktuk 3rd April 2007 zing dar 10:30 ah kan thukhawm leh dawn nia.

Sitting is adjourned.

11:45 A.M.